

# Iyiaintiok cīk Avvu Eetīnēy

## cīk Laarimak

Articles from the Laarim Community

First Edition

2019



South Sudan

This book is a collection of articles and stories gathered by recording from members of the Laarim Community in 2017.

Illustrations are from: *International Illustrations: The Art of Reading 3.0*. SIL International. 2009.

Contact Address:

SIL  
PO Box 64  
Juba, South Sudan  
[education.ssudan@sil.org](mailto:education.ssudan@sil.org)

© 2019, Laarim Translation & Literacy Project and SIL

First Edition	August 2019
Trial Edition	June 2018


Publisher: SIL-South Sudan

Place of Publication: Juba

## Lütēnīt cī tiinu

A ne alūt logoo cī Lomuno tīna, īthōng naboo a ne odoi naboo noko nē tdōk, abūrī tīn cīk Napungaiti. Alūt nyamacar cī rēēng dōō a ne, kaburi athii na cī kītdanyi dōōlī cīk maama wo. Ivitia thīna õõ Naangōrī ikiyyia ūük tōmōnyay balna da iviryi nō nēēgē tīn nīkē ne, vēlēk baa mī alūt nēēgē.

Thōōth thī cī nginicē neccie adait thī tōmōnya cīgīk, īthōng a ne abaak kēggē tīna gwuak alūucī ūggē tīna gwuak ūvvō te ūvvō ūcīkkō ūcī diinu. Aatī thī Laarimenti ētēēda cīkkō cīk ūvvō ūcī tiinu wo. Athanni kaala lootha athanni athii labak natē ma ngī īthīhīt tūūrī ūtī noko ne kōō. Thērō lōōcī neccie looc cī Lotuwowu, Lotuwo




thī cīk Tōōlōrōō, abaak nēēgē titimma ūcoo. Anyi Thērō Kurrubu kōtōd bīyēnīy wūk maantīk abaak nēēgē natē baa ngī ūēn Akulino

alaan, ma baa ngī abaak nēēgē natē, kuluukta thī baa naaga koottia natē arūmē tīna cīgaak kī cīgīk, athii thī nēēgē Lotuwo cī uukōy kī Laarim. Abaak thī baa Laarimi natē Thērōtīj jurrung athii balna nēēgē cī uukōy kī Lotuwo. Ōvvō thī doolia angīda tīn wec kuukitō Nādukuk, avvunnu tī pee niigia buu adakcu kiding natē. Ivitia thī Kērēngēna noko, īthōng kīi kīcīnīt ngini coo jurrung. Adiim kōvvō īcī Awurellio, acuwuanni tīna ramma kēdēca nō ngini coo ma thī ngī kēdēca wo, kī thī kōtōd tang īmma ōkkō īcī Cudumi kōvvō kacuwaneca gōtōōnōga cīk eēn Didinga eēn buu.

## Õthōōth baatī Nakai Natōlatēy thōōth cī Nyarobinya cīk Thukulak.

Aduwa balna doolia a ne itionta nyarobinya, aduwa balna ii, īthōng thīna yoko kadiimi na buu yoko nyatarka mēēlī eet ticanē. Abūnna yoko woyyia ma ngī adiimiay televonī īmma ullu woyyia gōō ma ngī kōthōōthōy, ullu woyyanī. Kērēpana katī na buu nyarobinya cīk kūtanē televon, īthōng kērēpana katīna gōō et īmma buu. Ma tīna gōō eeti neccie ikiyyia gōō kīi kuruktei, īthōng kōthōōthōy.

Kooyien ōgōōnu abūnna ii  
kabūnna kēngērōy thēk  
kōthōōthōy nō ii kīthīktōy  
moloowua, kaa na buu bōlōwath  
ne abūnna ngī kamīcī kīyokowo.



Abūnna eeta vēlēk, Kēmēr dōō cī balna ēgērēthanni ūlōō ngato, īthōng gii dūuwūk dōō cī kothii tammu vēlēk. Kapīrnana itin coo, örrōt adakcet boobo gimmanoko kadangna toko. Ellet Nyekuci tīna? Kaanē Kooyien ennek Nakai ne, a Kuakōlī ne, rēpanaha gimma, īthōng itionaha aneeta ngato ūlōō. A Nadoci ne rēpanaha, bēraha mīlaya kīpīra gimmanoko. Yoko nō ngato kothoothi kathī gōō ne, kōdē a cī athihi. A ne kadiima tīna, īthōng itiona katī ngēnē kerebo woyyia thī kaavu eeti ūmma cī aku ayahaci thī woyyianī. Kabūnnana naaga vēlēk ngato kothii thōōth cī gerthe.

## Thōōth cī tōmōto

Ma balna tīna cīkkō ma ngī aatī, kēgēenyca naaga noko tōmōt cī athī Lopulangiro wo kīcīna na buu. Ōngōlanni balna tōmōt neccie cī apulanni naboo bowuc cī adīhī gimmanoko kerebo da Malamoi abūrī ūgōōn kuu? Ii abūrī baaba abūrī tōmōt coo a ne tōmōt cī Ngītulabowu coo a Lōbalīngā ne, uwi Lōkaimoi anyīk kikiyyia. Ivitia, ivitia, ivitia tīna cīkkō kōdōlanit Lōdīta. Īthōng thīna amaara naboo baangī cī baaba kī baaba ūük itik ngaa coo. Atik ūmma Nakūrēngiro baatī Arikori Nangolio ikiyyia anyīk et ūmma cī a Apa Looyia cī ayak tīna. Anyīk Lokiyo cī a Nyarabēy eet cīk Lotodonyangī nēēgē ikiyyia ūyaatī Nagurunyangi awotī Aweei ngōōnī Lotodonyang cī yaatīnnī ne, tūng yaatī Aweei ikiyyia anyīk Loruwo et ūmma Loruwotīy baa gōō mī ēkēba baangī. Ikiyyia thī ennehet ageeta ne, owobit thī ngītī nung tī lōōla nuuyang cī.

Nyamorunyangī neccio nyakamūranit nē Loremī. Ngītī thī yoko kivitaha naaga natē nēnēn ikiyyia balna ciith cīnīng ithiwik ngato, cīnang ī cīk ngayyik koo dōō. Itiryiay doolia cīkkō vēlēk natē Natuluba, Nakiru, Kadong, Napiyo ikiyyia thī balna īdīmta eeta kalawan ikiyyia thī ngaa neccie Loribowa ëë. Itik Lōjōkō, itik Lōjōkōmōi kī yoko yaatī Lomua agayyu pee niigia et wū a Lokoropira ngato. Ngaa wū yaatī Lokoripira ngaa cī malotī Tuala atik Longorialuka aviranī aruwue kēnnē nō ëthēn cī yaatī Naredi. Iviriaī thī Longorialuka coo ī thī nē ne, kūuk kamaaryik ciith coo. Ī mēēlī tīna ciitha īcoo, baa gōō nga aruk eeta tīn nīk kīdīk itiha itiha thīna, entek thī eeta ma naboo ngī ngaa cunnio. Tīk niia noko ngaa cunni õgōō thī baa thōōth neccio noko. Odongothīk thī yoko logoo cī Lōjōkō ūtūngēt ageeta, ī ne kiittia cīk rēēng naaga aga pee nē dūuwük ciith coo dōō. Ūtūbūret ageeta kōdē kidiim naboo lōgōō cīgaak kiittia thī naaga buu ne, thōōth bathī cī inyia cīkkō.

Ngamuara a ne baaba ngēnē baang Lotodonyangī Malamoi atik nē ngōōnī Lotodonyang nyakamūranit cī yaatīnnī yaatī Natuluba nēn ī itik thīna, itik īmma Nangolio nēn. Ikiyyia īmma itik eeti cī a Apa Looyia baatī Lokiyo ngōōnī Lotodonyang cī yaatīnnī ikiyyia īmma itihe Loruwotīy. Awotī Aweei ngōōnī Lotodonyangī noko Aweei, baatīnnī īmma Aweei midingnu cunung avvuyyu niigia Aweei athinnu ne maama.

Athīnnet Aweei ageeta ne, lōgōō cīk malotī yaatīnnī, yaatīnnē Nakūrēnyangī a ageeta ne, lōgōō cīk maama kir logoo cī

Nyamorunyangī. Aweei ëen ngoonogua ramma Nakalle kī Nakiney cī atik Lotularithi cobbi neccie. Ngōõnõgī Aweei nēëgēn ëen nēëgē ciitha īcīnīng iyyio, ū Aweei dōõ cī maacī a thī Aweei Lotodonyang ne maama kir. Ajja thī thēk nō kir ngato cī ciith cī yaaya thēk kir naaga cīk thēk cīk ciith cī awotunni, cī Natuluba thōng kir. Ōõ Lokorai nīcī balna aruk eeta ëe, aga thēk niia kir lōgōõ cīk Lotodonyangī cobbi yaatī: Loremī kī kōwōb yaatī; Lomura ōwōb yaatī; Lopiri wū athī Lodingmoi ëen kēggē nato iyyio ikiyyia ū ngaa īmma cī athī thar; Nawui yaatī Nyemugunyi ūthōng utdurnēcē īcī yaangī yaatī Ngamuara ngaay cīk baaba cobbi Lotodonyangī cīkkō. Kivitaha thī naaga natē vēlēk doolia cīk Lotodonyangī cobbi cī a: Lōpūngay gōtōnī cīnnī; Loremī ikiyyia ū gōtōnī ca; Cumangor iyyio; Ikiyyia ūthī Longor ūthī baatī logoo wū a Naloma ëen kēggē te ciia wūnīng. Ngoonogua ramma ëen kēggē tūrgērēm. Ikiyyia ūthī Lokorai ciia cīnīng odoi gotonia cīnnī ngōõnī cīnīng īmma Nawui nīcī atik Namonia ëe.

## Ōthōõth Lopetanyangī thōõth cī adaī tīna mana cīnīng

Kalayye balna na monogo naboo mī kalayye na wo, ogoogo avī Thīttanī cī balna anyi eet kōõt Lawurōtīy kovvoyya ganōna õõt ayakta dīla kī kadayyīek look. ū naboo thīttanī cīnīng ëe, ū gērtha thōõth neccie adak tīna mana ara eeta ngaay cērēmē arurra kolianīnē kīcīna na ngaay natē utuluuthia a ne avvu ngato uukceta

adaktung nyia a ne aryiaet ijgio uukceta otti maacadēt buu vēlēk. Kītīngā thīna kīthī ne kogooni pee kuu? Utulu aneeta thīnīn eet cīk kollik, kalawa na buu Nyekuc kennei Nyekuc ne Nyekuc ijgia da ēēlani ngēnē woccia cī abacī jang woccia cī abacī jang woccianī yoko baa niia ma ngī ēngēnycanet, īthōng kī tūura amūt cugunik īnōōnō cī arīca looc wo. Kenneci ne ēla kīyokowo dīdī, nyia cī aku eeti kikiyyia kōdōnyanea ngaa nyia? Ī ī toko thōōth cīnanī jang Nyekuc? Yoko thōōth coo a cī ēngēnycana balna niia aneeta kī īnōōnō kītīngā thī balna na. Kamūdōthii thīna thī baa na ngaa cī Nabūnya kūmūdothīha ebekcie kennea ne, lucciay ma nga kajinona wo, a kēnnē ne, eet nekuo nganī kēnnē avīlīcī maalna õōgī nekuo ngaanī õrōī lūwatatō wo. Avvu eeta cīkkō anyi tīn kabaito joonui kī yoko. Yei ! Ma baa naboo tamanoko ivitia eeta cīkkō uukitō ngaay abic kaliēnī kī keteddia ngaay cērēmē vēlēk kī thī kimiryie. Ivitia eeta amūdacet manatō ma kajina kennecca ne oo ngēnē niigia aatī tiv noko. Ma balna natē ivitia eeta ītō ne kedeciahā thōōth cī ganono Nawurotīy ne vēlēk kennea na ne kadīma toko labī nga ivitia da edeemtīk. Kūwa na īthōng ma baa ma ngī karawothi looru nīcī gōō Loriyowa ēē, kuyuwutha. Adak baa tīna mana, īthōng agamta eeta aneeta ijintanī ennecca ne agamnyie nyia kennei kēnnē na ne adak ba tīna mana aara eeta ngaay ceremua adiim kolianīna aar ngaay, kī ngaay cīgīk. Abūnna gōō thōōth neccie īcunung atduk thī eeta ooti.

Ma balna na kikiyyia kennea eet ne eeti ngī abaci thōōth cī Nyekuco ogoogo avī Nyekuci athīhī thōōth cī oo baangietī, gōō ma ngī adīma oo baangietī dīlanya ēē, īthōng agatantōī, ogoogo pee ēlēmī Nyekuci thōōth cīnīng. Ma ngī aavē niiā kījana utungeei nē vēlēk, yoko na kijiowa thōōth cī Nyekuco. Ma balna thīna natē othoothito eeta thōōth edeccia, kennea kēnnē na ne, ma ngī edecciawu thōōth, labī toko nga?

*Thōōth cī aduwa Lopetanyangī coo.*

## Õthōōth eeti thōōth cī kagamī kōrōōk

Tanga ērēpana tanga abūnna ngaay ma ngī aatī arittia dōōlī arittia cī ngayyi arittia cī maacī ikiyyia cī maacī ūūk thukula ikiyyia cī ngayyi ēē buu ūūk thukula, itirria dōōlī, īthōng oōt nēēgē vēlēk thukula. Abūnna gotonu buu abūnna ma ngī avī tōō, abūnna gōtōnī baaba buu ma ngī avī tōō. Gērtha thēk thōng te gotonu buu, dangan niiā noko gērtha ngaa buu nuunun, dangan niiā noko. Ma ngī avī boore wū tōmōnyawu dīma doolec wū mayyī, anyīk kagam boore



jurrung. Dīma nīcī mayyī ēē ūūkku ennewu ne, tang cī ūūmōrī umuddiawu avī tōō gaa tīn vēlēk, īthōng iyethu tīnā, cī gōō tang ūūmma agama mōōrītī itin coo iyethu. Abūnna ma ngī aga noko, ma ngī ūūmōrī tang ma tī ngerenniet noko ibboru. thōōth cī

booro nēnēn. Tang īmma cī nga na kīthī ne kuruwa, nyī adīma, tang īmma cī nga na kurui nyabolo, nyī adīma tīn taktak. Ma ngī alayyi eeta buu īthī niia noko ne, kolli baang avī baangī õlõõ, boore nēnēn.

## Thōõth cī manu kī lōkōrē

Keeginna naaga eet cīk katīyya lōkōrēwa wūnang, athii cī kabawōthīca lōkōrē cī eet õõgī buu. Katī ma ngī engeri niia maana wunni athii naboo eeti īmma cī õkkō ētēda labī manatō nīcē, ma katī ma ngī engerai niia ngaa wunni mana, athii naboo gonia cī õkkō avījahai lōkōrē. Yoko ma ngī athī ne, attī Laarimi natē ëē, adak nō tīna cīk eet nīkē mana cīnang. Lōõcī cīnang wo, looc cīnang thēk dō, kacini yoko na eet õthōõth vēlēk lōkōrē ongollie eeta cīk ëen Kenya kōdē Ithiopia kōdē Uganda athii cī avvu agamanet looc. Adiim thī naaga ngī kēbēk lōkōrēt cīgac wo, jurrung gērtha ma ngī agamanet eeti īmma. Kabūrī naaga thōõth cī adiim agamanet eeti lōkōrē kabūrna naaga thōõth nīcō õrrōt. Lōõcī ma ngī adiim tīn kegeco kalawa thōng, abūnna kēnnē. Kalawana baa yoko naaga looc cī ëgēwī tīna cīgak ko thōng.



# Thōōth cī kēngēnycī kelethia Nadukuwa

Katalna ngatī avvunni Paadīrnya, ūbūna lōōcī cīnang, abūnna ngī kayak kelethia ūlōō, gii cī anyet kīcīntē kagac gaala. Thoothonniok cīk ēēn ramma. Abūnna ngī kayak kaal cīk ēēn ramma cīkkō kelethia kī thukul. Yoko te ngī athīknu niigia thōōth coo wo, enneccung yoko te eeta ne, kōvvō kēngēnyēt kelethia nga? Ciith cī Nyekuco, ciith cī Nyekuco, niinia, niinia, ciith cī Nyekuco, yei! yei! Aniitia ngītī a Nadukuk, Kērēngē 1 Yei bīt arīk kelethia natē, arīk kelethia natē avvu eeta cīkkō, ūtōda nekie ka kurumtōy kōrgēna. Avvu eeta nekie ka kalacō Nyekuc kōrgēna ūcī Laarimo. Ūla tēngēny kelethia ūmma Loriyowa ka kītō kelethianya cīk Laarimak ramma. Nga naaga



kattīyya muwuratō kaganoko nga  
kattīyya muwuratō kadimnya  
naaga thōōth cī Nyekuco dōō  
kagayya. Adiim thī kagamnya  
gaala cīgaak koo kelethiawa,  
kelethia dōō cī alimannet kīcīntē.


## Gōōl cī kalawini

Ū ūbaangī thōng vēlēk arūgī, ma ngī ūōt nīk gerthek kēē, naaga vēlēk karūgī, kayai naaga rūgēt, ngaa coo, kayahai ū ūbaangī ūthōng arugi. Ngaa cī ciith coo ariti, arit dōōlī cīk maacīk, cīk ngayyik, ūgōō kete, kōdōkōthī ūgōō kete. Laarimi akaatī, akaatī,

akaatī kēēk, eēn borboroc, aduwa thōōth, aduwa thōōth, thōōth cīnac edemnyi, kūdūt. Yiey! Kaanē īnīnga kīgōlōī, nabuu īnīnga kīgōōl eeta, kathihi pee na a ne, ayakcu niigia thōōth, Murlenti ba gōō nanyanya agaai baa gōō Lobualī gii nīcē nēdō thōōth nīcē nēdō. Yiey! Abūnna niinia Naarimenti akaatī, Naarimi akaatī, aduwa thōōth, thōōth cīnīng edemnyi kōdōkōthī ōgōō kete ōgōō kete dōkīthī. Thōōth cīnīyang edemnyi kōdōkōthī ōgōōn kete ōgōōn kete. Yei eeti wū ayahanet ngittio itirria, itirria ngī gaala mēēlī ngī gaala mēēlī, mēēlī ōgōō kete ōgōō kete. Amīmī, amīcī jurrung amīcī jurrung, īnōōgō nēēgēn īnōōgō nēēgēn. Looca karūgī, karūgī, karūgī ma karūgī ma karūmē kī gaala. Nyī acalcali da gaala pee cīkkō eēn gōō gaala kuu yei logoi avvu da loota ōngōrōnyana nyia. Rūgētī ngī anyīk kikiyyia, rūgētī anyīk kikiyyia, baatī kōrōōk coo aballie ma nē ngērīnī ōmōgōōt aballie, abal tīna arittia dōōlī, aballie naaga dōō. Nyī anyi et īmma kikiyyia katamacina a ne, nga katamaci eeti īmma aniitia. Eeta wūk kavurenu aballie, aballie kaduwa naaga.

## Thōōth cī etheno kī nyakamuth

Tīna atī tō ngaanī yoko attīyya, avvu tīna ennei pee baatīnnē ngērīnī ne ngīda tīn kete kī kīdīma keelihia Ngītamo doolec maam agamiay doo coo dōkīthī. Īthōng kivitia thī naaga keelik doolec maam, kövvō naaga araana nīcē ōkkō a cī alamī nyakamuth. Yoko naaga kadīma naaga nīko keelik doolec maam ūūk dooleca. Ngī



athii ne kothii gimma  
ageeta cī kothoothi,  
kōthōōth naaga thōōth  
vēlēk cī abūnna dōō.  
Athii thōōth īmma cī  
naboo kaduwai tō cī  
gerthe kothii. Kolli, kolli  
ngiran yoko naaga cīk  
kangīd kaal wo, kaduwa  
kothii thōōth cī kirioni

doolec buu adawōy te nyiangu eeti ūwa. Ōkkō thōng jurrung kōvvō  
naaga tīnīy, adai tīn wugunik, ma yoko naboo a ne nyakamuth,  
baa ngī aduwa Aruangōlē. Aruangōlē ma ngī ēēn nyakamuth  
kūrūmtē thēk kete abūnna õrrōt ngī kadak kōdōwē kīyokowo.  
Kīmīnanit Nyekuc kete katalit a ne abūnna karūmē ngatī odoi  
īthōng kadait, īthōng kathantē kī tibethuana. Aavu ria coo aavu  
Thugura aavu Ngarahaca , Chawuana. Yoko naaga īnīnganī  
karumōy gii wū baa gōō arūmēēnī eeta wūk obbitik ogoogo da gōō  
abūnna ma ngī ūvvō tīna vēlēk Nawekiringa. Kerebo da eeta baa  
lōōla ūgōōn kuu mēēlī baa eeta õrrōt erkinya nīkē.

## Thōōth cī kēlēgē cīk ēēn wec

Thōōth cī tulluwo kī guluth coo, avī balna guluth īthōng ūūk ēdēt kōōnga cīgīnīk baal. Ma thī balna ngerenniet ayaha ūūwī tuliatulia īcīnnī.

Ma balna natē, urumtōy nē kī gulutha, īthōng īthaa tulluwu gulutha ennei ne, kīthawōy guluthang, a kēnnē guluth ne, abūnna wudenyu. Ijin wudenyu gōōnī ethek ne, nyia cī ayaha wo?

A kēnnē nē ne, kayai kōōnga, īthōng īthī wudenyu ne, nyanya bathī aneet buu cīk kīdīk? A kēnnē guluth ne, ma waabal na ma ngī kedettie ēē, otholeca da eeti īmma? Kajuranē thēk na. Aavu tulluwu, īthōng ahada thōōth īmma ī ne, kadai tī thēk na kōōnga nīko aavu nē, īthōng ivir ūūk alaam guluth īcī owu īthōng atangu tahanykany a moko ne, kadaaha.

Ma baa ma ngī aku guluth arūbai īnōōnō ūngī īcīn noko, īthōng ūtūngek looc edecek ūūk īcī owu. Ma natē ivir naboo lowūdēnyī kūūk katangū mūdūhūnyūk natē. Ūūk ūmūdōthīk naboo guluth īnōōnō gōōla īthōng īthī ne, uwuy adaaito wanīco cīkkō īgīra lōnangī.

Ma thī baa ma ngī acīn guluth ma ngī eteethiay wo, ītīngā naboo utuwanēē ūkkō naboo aruwa riinya a ne kadaai. Ūrūbōthīk naboo guluth īnōōnō kī thī kēbēra kaarīk ngatī attē kōōnga ēē. Ma baa ngato ī ne, nyē kūūwīk wūk ēēn ramma wūk viyyio ungnothi vurtia, ma natē ūūk ūrūbōthīk nīkē ithiico ūbōda īthī ne kikiyiak banaak.


Arūbai īdīm tulluwu ūtōdī kēēta īthōng ērēpanōy guluth, īthōng īcīn thooc kī kōwōb nē thooc, ma natē īthīnga ijiowa nē kōōngā kī tulluwu, īthōng aar thī nē guuwunya.

Īthī nē ne, ūūwī ngēnē kōōngā cīganīk, ēdēcī kēnnē kireerī a ne, wee wee a guluth ne, jang, jang anyīk ēlē cīnnī vōlōng inihith, īthī naboo ne, ūūwī, ūūwī kireerī wee! Wee! Urumtōy thī kireerī kī gulutha īthōng ēnnēk guluth kireer ne, ūūwī lowūdēnyī kōōngā cīganīk.



Aavutō nēēgē īthōng ērēpanit thooc cī lowūdēnyī, īthōng alanglang nyaapō kēēta vurtia ī ne, adiim yoko eeta īnōōnō, īthōng aavu gōō, īthōng ī ne kiviru. Aari thī oo looc, īthōng ūmūūnūc kīna, ma thī baa natē ma ngī ajinōy kireerī kī guluth ēē, ennei guluth kireer ne, acini woccia te lōwūdēny nīco? A kēnnē kireerī ne, karumona kī lōwūdēny bōlōwath, kudutoca īcī gōō nang kēbērania kūnyē.

Ēdēddē kēnnē nē būr cīk ēlēta kireerī a guluth ne, ēēn gōō lowūdēnyī kūrūth cunni, ēpēkantōy nō nēēgē dōō kadi ngī uukōy. Ma thī baa natē īcīn nyaapō aabūr thōōtha ī nē noko cōbōk cōbōk. Ma baa natē iliba noko, ngaatī thī aviri ēdēnyca thī kireerī kī guluth kī kūtūvvēcō kēntēk ne lokwel! Lokwel nyī aviri kērēpana naaga




Lōwūdēny ijja da kijintina acini woccia  
lōwūdēny gōõl cī ōkōyyī.

Ma baa ma ngī acīn eeta nyaapō wo,  
īkīny nyaapō idium ngī ōkkō kēēta  
tiddina. Atduk thī nēēgē kēbērē kīcīnīt  
lōwūdēny kēēta tiddina ma natē ītō ne  
uwuy! Uwuy! Neccio tdukuaha dongok  
cannī. A lowūdēnyī moko ne, tooko ma  
ngī kanyina alu gōõ kēnnē guluth kī gōõ  
dōõ wū dīcī.

Ma thī mī ajuranī tulluwu kōõnga wo, ēnntēk eeta nyaapō ne, kadaī  
yoko thēk tulluwu nyia? A nyaapō ne kalucciay nenne na ī thī  
lowūdēnyī, nīco noko ne, ītīngawīk nyaapō vōlōng wīnnī ennek  
gōõnōgī ne, ētēngēnycahangū da tī.

Tī cī kōdōngē na kēēt coo, cī aavē lowūdēnyī wo, aavu īthōng  
ītīman eyelek kīn cīgīnīk kēēta. Ngatī acīnī ūtūbūwōthīk bōõnō  
īmma cī a te kartē kī kētēda kartē nyīgītēy kaa keyelek eet kennek  
ne, icintu thī maacadēt cīganīk cīkkō.

Lēhēdē nēēgē ūrrōt ētēngēnyacak thī eeta  
nyaapō tī cī ūdōngī nē kēēt etehebjī  
nyiangu lowūdēnyī noko. Adakcie  
nyiangu kēēta tiddina noko ma ngato  
atadīk thī nyaapō tī ūwa kī kennek  
lōwūdēny ne, tiona dongok adakcie kēēta




tiddina tiv noko ma natē, atadīk thī nyaapō tī ūwa kī kennek lōwūdēny ne, tiona dongok.

Ajuranī nē noko ma baa vurtia ūūk Nyaapō ahada thōōth īmma ma natē, noko ikiyyia kuvuro cī ēdēēma kēēt cī aavē lowūdēnyī wo. Ma natē noko ūngōtha lowūdēnyī kī kaarīk oo cīnnī kēēta vurtia ūmōnnī thī gōō ngōōtī kēēta. Īthī kēēt kēnyēkēnyēk ma ngato alanglang thī lowūdēnyī kittia dongowa tī dīcē kōōnga cīk guluthak.

Ma thī mī acīn nēēgē wo, ethek kireerī guluth ne, nya bathī cīk kīdīk

kadak nabuu, muot kēnnē guluth ma ngato umudie kireerī, īthōng īthī ne nyē kadak nyaapō. Ma nga guluth acīn Kōōnga amūdaai nyaapō ūnīk viyyio reenu, vīnīnīk uturura ēlē cīnnī daāītha īcī gulutho.



*Marino Koliputh*